

## 第一章第一節

# 易經證釋 《繫辭傳》

天尊地卑。乾坤定矣。卑高以陳。貴賤位矣。動靜有常。剛柔斷矣。方以類聚。物以群分。吉凶生矣。在天成象。在地成形。變化見矣。

## 第一章第二節

八卦成列。象在其中矣。因而重之。爻在其中矣。剛柔相推。變在其中矣。繫辭焉而命之。動在其中矣。

吉凶悔吝者。生乎動者也。剛柔者立本者也。變通者趣時者也。

## 第二章第一節

是故易有太極。是生兩儀。兩儀生四象。四象生八卦。八卦定吉凶。吉凶生大業。

## 第二章第二節

是故天生神物。聖人則之。天地變化。聖人效之。天垂象。見吉凶。聖人象之。河出圖。洛出書。聖人則之。

## 第二章第三節

是故法象莫大乎天地。變通莫大乎四時。懸象著明。莫大乎日月。崇高莫大乎富貴。備物致用。立象成器。以為天下利。莫大乎聖人。

探賾索隱。鈎深致遠。以定天下吉凶。成天下之亹亹者。莫大乎蓍龜。是故蓍之德圓而神。卦之德方以知。六爻之義易以貢。

## 第三章第一節

一陰一陽之謂道。繼之者善也。成之者性也。成性存存。道義之門。

## 第三章第二節

天地之大德曰生。聖人之大寶曰位。何以守位曰人。何以聚人曰財。理財正辭。禁民為非曰義。

## 第三章第三節 第一段

顯諸仁。藏諸用。聖人以此洗心。退藏于密。吉凶與民同患。神以知來。知以藏往。故君子之道鮮矣。

## 第三章第三節 第二段

顯道神德行。仁者見之謂之仁。知者見之謂之知。百姓日用而不知。鼓萬物而不與聖人同憂。盛德大業至矣哉。富有之謂大業。日新之謂盛德。

## 第三章第三節 第三段

生生之謂易。成象之謂乾。效法之謂坤。

極數知來之謂占。通變之謂事。陰陽不測之謂神。

#### 第四章第一節

乾道成男。坤道成女。乾知大始。坤作成物。乾以易知。坤以簡能。易則易知。簡則易從。易知則有親。易從則有功。有親則可久。有功則可大。可久則賢人之德。可大則賢人之業。易簡而天下之理得矣。天下之理得。而成位乎其中矣。

#### 第四章第二節

夫乾。其靜也專。其動也直。是以大生焉。夫坤。其靜也翕。其動也闢。是以廣生焉。廣大配天地。變通配四時。陰陽之義。配日月。易簡之善。配至德。子曰易其至矣乎。夫易。聖人所以崇德而廣業也。知崇禮卑。崇效天。卑法地。天地設位。而易行乎其中矣。

#### 第四章第三節

乾坤其易之緼邪。乾坤成列。而易立乎其中矣。乾坤毀。則无以見易。易不可見。則天地或幾乎息矣。子曰乾坤其易之門邪。乾陽物也。坤陰物也。陰陽合德。而剛柔有體。以體天地之撰。以通神明之德。是故闔戶謂之坤。闢戶謂之乾。一闔一闢謂之變。往來不窮謂之通。見乃謂之象。形乃謂之器。制而用之謂之法。利用出入。民咸用之。謂之神。

#### 第五章第一節

易與天地準。故能彌綸天地之道。仰以觀於天文。俯以察於地理。是故知幽明之故。原始反終。故知生死之說。精氣為物。遊魂為變。是故知鬼神之情狀。與天地相似。故不違。知周乎萬物。而道濟天下。故不過。旁行而不流。樂知天命。故不憂。安土敦乎仁。故能愛。範圍天地之化而不過。曲成物物而不遺。通乎晝夜之道而知。故神无方而易无體。天地設位。聖人成能。人謀鬼謀。百姓與能。八卦以象告。爻象以情言。剛柔雜居。而吉凶可見矣。

#### 第六章第一節

天一地二。天三地四。天五地六。天七地八。天九地十。天數五。地數五。五位相得而各有合。天數二十有五。地數三十。凡天地之數。五十有五。此所以成變化而行鬼神也。大衍之數五十。其用四十有九。分而為二以象兩。掛一以象三。揲之以四。以象四時。歸奇于扚。以象閏。五歲再閏。故再扚而後掛。

乾之策二百一十有六。坤之策百四十有四。凡三百有六十當期之日。二篇之策。萬有一千五百二十。當萬物之數也。

是故四營而成易。十有八變而成卦。八卦而小成。引而伸之。觸類而長之。天下之能事畢矣。夫易廣矣大矣。以言乎遠則不禦。

以言乎邇則靜而正。以言乎天地之間則備矣。是以明於天之道。而察於民之故。是興神物以前民用。聖人以此齋戒。以神明其德夫。

### 第七章第一節

是故易者象也。象也者像也。象者材也。爻也者。效天下之動者也。爻象動乎內。是故吉凶生而悔吝著也。吉凶見乎外。功業見乎變。聖人之情見乎辭。聖人設卦觀象。繫辭焉而明吉凶。剛柔相推。而生變化。象者言乎象者也。爻者言乎變者也。

吉凶者言乎其失得也。悔吝者言乎其小疵也。无咎者善補過也。

是故吉凶者。失得之象也。悔吝者。憂虞之象也。變化者。進退之象也。剛柔者。晝夜之象也。六爻之動。三極之道也。

是故列貴賤者存乎位。齊大小者存乎卦。

辨吉凶者存乎辭。憂悔吝者存乎介。震无咎者存乎悔。是故卦有大小。辭有險易。辭也者各指其所之。

是故君子所居而安者。易之序也。所樂而玩者。爻之辭也。

是故君子居則觀其象而玩其辭。動則觀其變而玩其占。是以自天祐之。吉无不利。

### 第八章第一節

聖人有以見天下之賾而擬諸其形容。象其物宜。是故謂之象。

聖人有以見天下之動。而觀其會通。以行其典禮。

繫辭焉以斷其吉凶。是故謂之爻。

言天下之至賾而不可惡也。言天下之至動而不可亂也。

擬之而後言。議之而後動。擬議以成其變化。

子曰書不盡言。言不盡意。然則聖人之意。其不可見乎。

子曰聖人立象以盡意。設卦以盡情偽。繫辭焉以盡其言。變而通之以盡利。鼓之舞之以盡神。是故形而上者謂之道。形而下者謂之器。

化而裁之謂之變。推而行之謂之通。舉而措之天下之民。謂之事業。

是故夫象。聖人有以見天下之賾。而擬諸其形容。象其物宜。是故謂之象。聖人有以見天下之動。而觀其會通。以行其典禮。

繫辭焉以斷其吉凶。是故謂之爻。

極天下之賾者。存乎卦。鼓天下之動者。存乎辭。

化而裁之。存乎變。推而行之。存乎通。

神而明之。存乎其人。默而成之。不言而信。存乎德行。

## 第九章第一節

易有聖人之道四焉。以言者尚其辭。以動者尚其變。以制器者尚其象。以卜筮者尚其占。是以君子將有為也。將有行也。問焉而以言。其受命也如嚮。无有遠近幽深。遂知來物。非天下之至精。其孰能與於此。參伍以變。錯綜其數。

通其變。遂成天地之文。極其數。遂定天下之象。

非天下之至變。其孰能與於此。

易无思也。无為也。寂然不動。感而遂通天下之故。非天下之至神。其孰能與於此。

夫易。聖人所以極深而研幾也。

惟深也。故能通天下之志。唯幾也。故能成天下之務。唯神也。故不疾而速。不行而至。

子曰。易有聖人之道四焉。此之謂也。

易之為書也不可遠。為道也屢遷。

變動不居。周流六虛。上下无常。剛柔相易。不可為典要。唯變所適。其出入以度。外內使知懼。又明於憂患與故。无有師保。如臨父母。初率其辭而揆其方。既有典常。苟非其人。道不虛行。

## 第十章第一節

易之為書也。廣大悉備。有天道焉。有人道焉。有地道焉。

兼三才而兩之。故六。六者非他也。三才之道也。

道有變動。故曰爻。爻有等。故曰物。

物相雜。故曰文。文不當。故吉凶生焉。

易之為書也。原始要終。以為質也。六爻相雜。唯其時物也。

其初難知。其上易知。本末也。初辭擬之。卒成之終。

若夫雜物撰德。辨是與非。則非其中爻不備。

噫。亦要存亡吉凶。則居可知矣。

知者觀其象辭。則思過半矣。

二與四。同功而異位。其善不同。二多譽。四多懼。近也。

柔之為道。不利遠者。其要无咎。其用柔中也。

三與五。同功而異位。三多凶。五多功。貴賤之等也。

其柔危。其剛勝邪。

陽卦多陰。陰卦多陽。其故何也。陽卦奇。陰卦耦。其德行何也。

陽一君而二民。君子之道也。陰二君而一民。小人之道也。

## 第十一章第一節

夫乾。確然示人易矣。夫坤。隤然示人簡矣。  
其稱名也。雜而不越。于稽其類。其衰世之意邪。  
夫易。彰往而察來。而微顯。闡幽開明。而當名辨物。正言斷辭。則備矣。其稱名也小。其取類也大。  
其旨遠。其辭文。其言由而中。其事肆而隱。  
因貳以濟民行。以明失得之報。

## 第十二章第一節

亢龍有悔。

子曰。貴而无位。高而无民。賢人在下位而无輔。是以動而有悔也。  
(乾九三)

履霜堅冰至。

子曰。履霜堅冰。陰始凝也。馴致其道。至堅冰也。是故君子用以戒懼。故繼之以敬義修德。(坤初六)

勞謙君子有終吉。

子曰。勞而不伐。有功而不德。厚之至也。語以其功下人者也。德言盛。禮言恭。謙也者。致恭以存其位者也。(謙九三)

不出戶庭无咎。

子曰。亂之所生也。則言語以為階。君不密則失臣。臣不密則失身。幾事不密則害成。是以君子慎密而不出也。(節初九)

鳴鶴在陰。其子和之。我有好爵。吾與爾靡之。

子曰。君子居其室。出其言善。則千里之外應之。況其邇者乎。居其室。出其言不善。則千里之外違之。況其邇者乎。言出乎身。加乎民。行發乎邇。見乎遠。言行君子之樞機。樞機之發。榮辱之主也。言行君子之所以動天地也。可不慎乎。(中孚九二)

初六藉用白茅无咎。

子曰。苟錯諸地而可矣。藉之用茅。何咎之有。慎之至也。夫茅之為物薄。而用可重也。慎斯術也以往。其无所失矣。(大過初六)

子曰。作易者。其知盜乎。

易曰負且乘。致寇至。

負也者。小人之事也。乘也者。君子之器也。小人而乘君子之器。盜思奪之矣。上慢下暴。盜思伐之矣。慢藏誨盜。冶容誨淫。易曰負且乘致寇至。盜之招也。(解六三)

同人先號咷而後笑。

子曰。君子之道。或出或處。或默或語。二人同心。其利斷金。同心之言。其臭如蘭。(同人九五)

### 第十三章第一節

易曰。自天祐之。吉无不利。

子曰。祐者助也。天之所助者順也。人之所助者信也。履信思乎順。又以尚賢也。是以自天祐之。吉无不利也。(大有上九)

易曰。憧憧往來。朋從爾思。

子曰。天下何思何慮。天下同歸而殊塗。一致而百慮。天下何思何慮。日往則月來。月往則日來。日月相推而明生焉。

寒往則暑來。暑往則寒來。寒暑相推而歲成焉。

往者屈也。來者信也。屈信相感而利生焉。

尺蠖之屈。以求信也。龍蛇之蟄。以存身也。

精義入神。以致用也。利用安身。以崇德也。過此以往。未之或知也。窮神知化。德之盛也。(咸九四)

子曰。知幾其神乎。

君子上交不諂。下交不瀆。其知幾乎。幾者動之微。吉凶之先見者也。君子見幾而作。不俟終日。

易曰。介于石不終日。貞吉。

介如石焉。寧用終日。斷可識矣。

君子知微知彰。知柔知剛。萬夫之望。(豫六二)

子曰。顏氏之子。其殆庶幾乎。

有不善未嘗不知。知之未嘗復行也。

易曰。不遠復。无祇悔。元吉。(復初九)

易曰。公用射隼於高墉之上。獲之无不利。

子曰。隼者禽也。弓矢者器也。射之者人也。

君子藏器於身。待時而動。何不利之有。動而不括。是以出而有獲。語成器而動者也。(解上六)

子曰。危者安其位者也。亡者保其存者也。亂者有其治者也。是故君子安而不忘危。存而不忘亡。治而不忘亂。是以身安而國家可保也。

易曰。其亡其亡。繫於苞桑。(否九五)

天地絪縕。萬物化醇。男女構精。萬物化生。

易曰。三人行則損一人。一人行則得其友。言致一也。(損六三)

子曰。君子安其身而後動。易其心而後語。定其交而後求。君子修此三者。故全也。危以動則民不與也。懼以語則民不應也。无交而求則民不與也。莫之與則傷之者至矣。

易曰。莫益之。或繫之。立心勿恆。凶。(益上九)

善不積不足以成名。惡不積不足以滅身。小人以小善為无益而弗為也。以小惡為无傷而弗去也。故惡積而不可掩。罪大而不可解。

易曰。何校滅耳。凶。(噬嗑上九)

子曰。小人不恥不仁。不畏不義。不見利不勸。不威不懲。小懲而大誡。此小人之福也。

易曰。履校滅趾无咎。此之謂也。(噬嗑初九)

子曰。德薄而位尊。知小而謀大。力小而任重。鮮不及矣。

易曰。鼎折足。覆公餗。其形渥。凶。言不勝其任也。(鼎九四)

易曰。困于石。據于蒺藜。入于其宮。不見其妻。凶。

子曰。非所困而困焉。名必辱。非所據而據焉。身必危。既辱且危。死期將至。妻其可得見邪。(困六三)

#### 第十四章第一節

子曰。夫易何為者也。夫易開物成務。冒天下之道。如斯而已者也。

是故聖人以通天下之志。以定天下之業。以斷天下之疑。

古者包犧氏之王天下也。仰則觀象於天。俯則觀法於地。觀鳥獸之文。與地之宜。近取諸身。遠取諸物。於是始作八卦。以通神明之德。以類萬物之情。

是故剛柔相摩。八卦相盪。鼓之以雷霆。潤之以風雨。日月運行。一寒一暑。

火水相濟。一質一文。作結繩而為網罟。以佃以漁。蓋取諸離。

包犧氏沒。神農氏作。斲木為耜。揉木為耒。耒耨之利。以教天下。蓋取諸益。

日中為市。致天下之民。聚天下之貨。交易而退。各得其所。蓋取諸噬嗑。

神農氏歿。黃帝堯舜氏作。通其變。使民不倦。神而化之。使民宜之。易窮則變。變則通。通則久。是以自天祐之。吉无不利。黃帝堯舜。垂衣裳而天下治。蓋取諸乾坤。

剡木為舟。剡木為楫。舟楫之利。以濟不通。致遠以利天下。蓋取諸渙。

服牛乘馬。引重致遠。以利天下。蓋取諸隨。

重門擊柝。以待暴客。蓋取諸豫。

斷木為杵。掘地為臼。臼杵之利。萬民以濟。蓋取諸小過。

弦本為弧。剡木為矢。弧矢之利。以威天下。蓋取諸睽。

上古穴居而野處。後世聖人易之以宮室。上棟下宇。以待風雨。蓋取諸大壯。

古之葬者。厚衣之以薪。葬之中野。不封不樹。喪期无數。後世聖人易之以棺槨。蓋取諸大過。

上古結繩而治。後世聖人易之以書契。百官以治。萬民以察。蓋取諸夬。

### 第十五章第一節

易之興也。其于中古乎。作易者。其有憂患乎。  
是故履。德之基也。謙。德之柄也。復。德之本也。  
恒。德之固也。損。德之修也。益。德之裕也。  
困。德之辨也。井。德之地也。巽。德之制也。  
履和而至。謙尊而光。復小而辨于物。  
恒雜而不厭。損先難而後易。益長裕而不設。  
困窮而通。井居其所而遷。巽稱而隱。履以和行。謙以制禮。復以自知。恒以一德。損以遠害。益以興利。困以寡怨。井之辨義。巽以行權。

### 第十六章第一節

夫乾。天下之至健也。德行恆易以知險。  
夫坤。天下之至順也。德行恆簡以知阻。  
將叛者其辭慙。中心疑者其辭枝。  
吉人之辭寡。躁人之辭多。誣善之人其辭游。失其守者其辭屈。  
變動以利言。吉凶以情遷。是故愛惡相攻而吉凶生。  
遠近相取而悔吝生。情偽相感而利害生。  
凡易之情。近而不相得。則凶。或害之。悔且吝。  
能知其言而候之幾。能說諸心而研諸慮。  
定天下之吉凶。成天下之亹亹者。  
是故變化云為。言事有祥。象事知器。占事知來。  
易之興也。其當殷之末世。周之盛德邪。當文王與紂之事邪。  
是故其辭危。危者使平。易者使傾。其道甚大。百物不廢。懼以終始。  
其要无咎。其孰能與於此哉。古之聰明睿知神武而不殺者夫。  
此之謂易之道也。

### 《繫辭傳》